

四庫全書

史部

欽定四庫全書

史部

名臣經濟錄卷三十二  
五至

詳校官檢討臣德生

編修臣裴謙覆勘

總校官知縣臣楊懋珩

校對官中書臣葉蘭

謄錄監生臣龔際美

欽定四庫全書

名臣經濟錄卷三十二

明 黃訓 編

兵部

武選上

襲替犯堂疏

王憲

武選清吏司案呈奉本部送兵科抄出羽林前衛親軍  
指揮使司僉事指揮使劉永昌奏臣伏聞洪武永樂洪  
熙宣德正統景泰天順等年軍職襲替並無堂兄弟姪

之分自成化十七年都御史何喬新建議之後議論始紛紛矣至弘治十八年兵部會官議得凡武職立功之人故絕親弟親姪曾經襲過者俱許相沿承襲其姪孫以下及堂兄弟姪等項旁枝俱不准襲自是親姪孫子孫被草不勝悲苦往往奏告不已至正德十四年該武選司議得立功之人故絕親姪曾經襲過既許相沿承襲則姪孫亦係應襲人數或親姪有故而親姪孫徑承襲事則不得襲以此議例不一人心不平往往不服奏

告不已又該先任兵部尚書今總制三邊尚書等官王  
瓊題稱查得洪武永樂宣德等年軍職故絕不論堂兄  
弟姪俱得承襲自成化十七年都御史何喬新建言題  
准事例止為見任軍職故絕查勘不係立功之人的派  
子孫不許承襲並無追論先年立功之人故絕不許堂  
兄弟姪旁枝承襲緣由本部節年議奏亦無姪孫不許  
承襲之例至弘治十八年新例姪孫以下方不許襲但  
姪孫即係親姪之子親姪許襲而親姪孫不許中間多

有襲過三四輩者一旦革充總旗無罪革職人心委的  
不平合無將官舍李宏等各父祖原係立功之人親姪  
孫曾經襲過者俱照弘治十八年以前舊例及成化十  
七年會官議准事例許其相沿承襲以後軍職襲替查  
係立功之人親姪孫沿襲一二輩以上與李宏等事體  
相同俱照舊例許其襲替以前減革襲過者待其子孫  
襲替之日查照改正照舊襲替緣係遵復舊例襲替軍  
職事理具題正德十四年二月十三日奉武宗皇帝聖

旨還照弘治十八年會議事例行欽此隨該本官奏稱  
臣等竊惟武職選授自洪武永樂以來至弘治十八年  
以前所行係祖宗舊制百有餘年相承之事所當遵守  
弘治十八年所議係一人一時之見所當改正臣等既  
知其非不敢隱默伏望聖明留神省覽許照弘治十八  
年以前洪武永樂以來舊制遵行事體幸甚緣係恪遵  
成憲議復軍職襲替舊例事理具題正德十四年二月  
二十三日奉武宗皇帝聖旨是欽此欽遵外自是武職

襲替得一蘇矣臣嘗竊觀正德十四年之奏有曰立功之人故絕親姪曾經襲過既許相沿承襲則姪孫亦係應襲人數或親姪有故而親姪孫徑承襲事則不得襲以此議例不一人心不平往往不服奏告不已臣謂觀是言也則知十八年立議之刻夫親姪孫本係應襲人數止因親姪有故未襲便欲革罷其官非酷刻而何其王瓊之議曰姪孫即係親姪之子觀斯言也則知血脉相承親切無間非踈遠旁枝者比姪孫固無異於姪也



姪而得襲姪孫不得襲此何理乎瓊又曰武職選授自  
洪武永樂以來至弘治十八年以前所行係祖宗舊制  
百有餘年相承之事所當遵受弘治十八年所議係一  
人一時之見所當改正臣等既知其非不敢隱默由是  
而觀則瓊之言不但於義理通天理合且與舊制合矣  
至正德十六年兵部尚書彭澤具題謂王瓊前奏頗招  
物議相應改正夫弘治十八年新例已該王瓊辨其非  
舊制乃一人一時之見其姪孫一節又已辨論通暢彭

澤既欲革罷王瓊之奏則當脩折王瓊前議之非詳辨  
弘治十八年立議之是可也今不細論彼此是非但朦  
朧誣以一句曰頗招物議是知理屈而但強誣之耳奈  
何自彭澤具題之後於今十年武職被革流蕩淪沒者  
甚衆不勝悲苦邇者兵部武選司起火延燒本部工部  
荷蒙皇上特垂訪察而歷年被革官舍仰皇上離照之  
下具本聲訴蒙武選司未與議處但照彭澤具題事例  
將官舍衆究提問外臣嘗伏讀皇明政要恭見洪武二

十九年九月大賚天下致仕武臣太祖諭之曰元末兵  
爭中原鼎沸人不自保爾諸將臣奮起從朕效謀宣力  
共平禍亂勤勞備至天下既定論功行賞使爾等居官  
任事子孫世襲永享富貴朕思起兵時與爾等皆少壯  
今皆老矣久不相見心恒思之故召爾等來所賜薄物  
以資養老爾等還家撫教子孫以終天年諸將叩首謝  
上因歎曰同歷艱難致有今日顧朕子孫保有無窮之  
天下則爾等子孫亦享有無窮之爵祿諸將臣無不感

激至有墮淚者欽此臣每讀高皇帝聖諭亦未嘗不墮  
淚感我高皇帝憫念武臣如此之至一則曰共平禍亂  
勤勞脩至二則曰同厯艱難致有今日一則曰子孫世  
襲永享富貴二則曰爾等子孫亦享有無窮之爵祿休  
戚相同之恩如此天地覆載之恩如此武臣子孫粉骨  
碎身豈堪補報哉伏望皇上仰體太祖之心俯察王瓊  
彭澤之奏果王瓊之奏有理彭澤之奏無謂乞勅多官  
會議將瓊所言查復施行虧枉官舍皆與改正庶使舊

制不為新議所壞正議不至橫為浮議所阻官軍幸甚  
臣不勝恐懼戰慄之至等因奏奉聖旨兵部看了來說  
欽此欽遵抄出送司查大明律內一款凡文武官員應  
合襲廕職事並令嫡長子孫襲廕如嫡長子孫有故嫡  
次子孫襲廕若無嫡次子孫方許庶長子孫襲廕如無  
庶出子孫許令弟姪應合承繼者襲廕若庶出子孫及  
弟姪不依次序攙越襲廕者杖一百徒三年欽此及查  
成化六年奏准武職絕嗣許從軍一祖子孫承繼其原籍

疎族不許又查成化十七年該都御史何喬新題照得  
軍職有絕嗣者原籍同姓之人或稱同祖叔伯之孫或  
妄稱同堂兄弟之子孫或乞養異姓詐作親生兒男招  
贅女壻詐作同宗子孫買求官吏隣佑人等保勘送部  
冒襲官職今內外衛所軍官該支俸糧俱自民出歲入  
有限而冗食無窮乞勅該部通行天下都司內外衛所  
軍官今後同宗之人原係立功授職者嫡派子孫方許  
保送承襲旁枝不許保送其旁枝已襲職任身故之後

再不許襲但有冒襲者限三箇月以裏首官改正冒襲之人并經該官吏等俱免問罪若執迷不首被人告發依律問擬照例發落本年九月二十八日會官議擬題奉憲宗皇帝聖旨是都准議欽此通行已久又查得弘治三年題准旁枝官舍有高祖原係總小旗者指揮革試百戶千戶革署百戶職事俱准承襲百戶革充總旗冠帶終身子孫准替旗役使之勉圖後功以後若無軍功雖遇例不得實授仍乞著為定例以後天下衛所保

到承襲之人與此同者俱照此例查革若高曾祖止是軍役不係功陞總小旗役之人子孫告襲者仍照見行事例不許承襲又有此遞降之例於前例少變矣乃查得弘治十一年奏准立功授職之人所出嫡親子孫方許遵依律條挨次保送赴部襲替但係旁枝不問親疎通不許襲其已襲者年老事故之日各該衛所不許再保伊男中間若高曾祖從軍原有職役及各親父祖襲替之後自立軍功俱各照依應得級數各另扣算一體



保襲至此遞降之例不行又復通行之舊矣又查得弘治十二年題准今後軍職無功授職之人年老病故絕嗣若係堂叔伯兄弟旁枝子孫不分已未襲替查審明白俱不許承襲外其同宗之人原係先委在營所的親弟姪承襲伯兄職事不分久近子孫俱許相沿承襲此又一例所謂親弟親姪曾經襲過者俱許照例相沿承襲其姪孫以下及堂兄弟姪等項旁枝皆不許襲衛所官員自今文書到日為始敢有違例保送者軍職問罪

調衛文職照例發落遇例不宥其旁枝子孫革去官職  
照依總小旗同宗之人皆得替補事例俱該收補總旗  
照例併鎗前例止許親弟親姪承襲此又申明惟此二  
項襲過方許相沿若親姪有故姪孫告襲即係疎遠不  
許承襲例起於此惟總小旗不拘犯堂故職雖減革俱  
收旗役犯堂革旗例方起此又查得正德元年題准軍  
職旁枝子孫高曾以上原有職役及親祖父襲替堂伯  
叔兄職事之後自立功通計三級以上者自有本等官

職其高曾以上原無職役親祖父襲替堂伯叔兄職事  
之後自立軍功一二級者例內不曾該載若不斟酌定  
擬未免輕重失宜今後旁枝子孫高曾以上原無職役  
親祖父襲替堂伯叔兄職事之後得功不分署職實授  
但一級者併收總旗子孫世與冠帶其二級者世襲署  
百戶庶幾情法允當經久可行以後遇有此等官舍保  
送襲替者悉照此例施行此親祖功遞加之例因前例  
開載未盡又立此例通前徹後則情法允當至矣盡矣

始終遵行五六十年及查得正德十四年題准洪武永樂宣德等年軍職故絕不論堂兄弟姪俱得承襲後自成化十七年都御史何喬新建言題准事例止為見任軍職故絕查勘不係立功之人的派子孫不許承襲並無追論先年立功之人故絕不許堂兄弟姪旁枝承襲緣由本年節行擬奏亦無姪孫不許承襲之例至弘治十八年新例姪孫以下不許襲但姪孫即係親姪之子親姪許襲親姪孫不許襲中間多有襲過三四輩者合

無將官舍李宏等原係立功之人親姪曾經襲過者俱  
照弘治十八年以前舊例許其承襲此例蓋徒論世次  
之親疎未嘗攷其父祖功德之有無糜費俸糧冒濫名  
器在當時已招物議之非在今日殊非為經久之法况  
今内外大小軍職衙門該支俸糧歲入有限而冗食無  
窮制節謹度尚不能給又使旁枝之人無功而食可乎  
及查得正德十六年內該本部題查得武職立功之人  
故絕其姪孫以下旁枝不准承襲係弘治十八年本部

會官集議題准通行事例蓋以惜名器為心故欲正濫襲之武職以國家軍儲為重故欲省糜費之俸糧隨時損益因事制宜十餘年來守而勿失本部又行具奏准襲頗招物議之非終非經久之法所據前例應合改正今後仍照弘治十八年題准事例姪孫以下人等仍不准襲其自正德十四年二月以後有照李宏等例襲過者待其子孫襲替之日一體減革本月十九日題奉聖旨是准改正還照弘治十八年會議事例行欽此又查得



該前因通查案呈到部看得指揮使劉永昌建議欲姪孫以下俱許承襲及引皇明政要聖祖訓諭武臣之詞欲我皇上勅議施行臣等伏覩聖祖訓詞有曰子孫世襲永享富貴又曰爾等子孫亦享有無窮之爵祿但指有功之人子孫而言非謂旁枝疎遠其父祖原無軍功者亦得享無窮之爵祿也又查得大明律內一款官員襲廕職事並令嫡長子孫有故嫡次子孫襲廕若無嫡次子孫方許庶長子孫襲廕如無庶出子孫許令弟姪



應合承繼者襲廕弟姪應合承繼蓋指親弟親姪同時者而言亦不及姪孫以下等項無功之人奈何歷年既深初意浸失軍職立功之人故絕原籍同姓之人或妄稱同祖伯叔之孫或妄稱同堂兄弟之子亦有乞養詐作親生贅壻詐為族屬買求官吏朦朧保送冒濫名器糜費俸糧故成化十七年都御史何喬新建議原係立功之人的派子孫方許保送襲職旁枝不許保送其旁枝已襲者身故之日不許再襲通行已久至弘治十八

年本部會官集議立功之人故絕親弟親姪曾經襲過者俱許相沿承襲其姪孫以下及堂兄弟姪等項旁枝俱不許襲一以惜名器之冒濫一以省俸糧之糜費叅之情法可為經久無容再議正德十四年因人建言本部輕易變更遂至物議沸騰未及二年遇我皇上龍飛之初首先舉正五十餘年盡善盡美事例至此復舊行之又已十年衆心已定何有他說况本部每兩月一選中間官舍多有係堂姪堂姪孫者亦有係堂伯堂叔堂

伯叔祖者原以的派有功相傳自一輩至十輩二十輩相沿無害其旁枝無功一輩固不可況至二三輩雖一朝一夕尚不可待又可至一輩二輩乎此即旁枝父祖別無另立功者也蓋有功子孫許其承襲雖遠不至禁革無功子孫不該傳襲雖近亦難准理本部該司文卷雖經燒燬部收貯選簿并內府印綬監內外貼黃俱各見在可查昨因賈永明等乘機妄行奏擾已經叅送究問今劉永昌又為論列前因臣等待罪本部凡可以便於

襲替無不奉宣德意豈敢故為異同不拘王瓊彭澤或  
可或否俱不必論顧爵祿國家勸功之典固不當使有  
功者弗食其報亦不當使無功者得濫其恩揆諸法例  
事理而論之立功人的派子孫不分親疎遠近照舊承  
襲親弟親姪曾經襲過者俱許相沿不革獨姪孫以下  
疎遠之人歷年事例俱在減革之數正以各人父祖原  
非有功偶因旁親有功者故絕例前相沿若復許其承  
襲則俸糧糜費人亦不知所重而何以勸有功耶兼且

各該藩府中尉人員時或缺祿不完衛所官軍亦皆  
糧無措嗷嗷待哺莫能相補度彼叅此獨可不加之念  
乎臣等竊惟弘治十八年會議事例前後遵行垂六十  
年名臣之所建議皇上之所舉正擬此律例平此人心  
雖萬世可以傳行委難別議相應申明遵守合候命下  
之日本部行移內外軍職衙門今後立功人故絕同時  
親弟親姪應合承繼及曾經襲過者方許遵照律例保  
送其姪孫以下及堂兄弟姪除親祖例前相沿又自立

有軍功者一體扣算保送其餘無功姪孫以下至堂兄弟姪等項及各人親祖沿襲職事之後別無自立軍功不許一槩妄保自文書到日為始敢有違例保送者軍職問罪調衛文職照例發落遇例不宥其旁枝子孫革去職役在內從本部在外從巡撫衙門照依總小旗同宗之人皆得替補事例俱收充總旗照例併鎗有功照例陞授著為定例使凡無功子孫不得倚奸混擾庶情法兩盡事體不致於紛更財用可省名器不至於冒濫

各都司衛所仍要刊刻板傍懸掛永遠遵守施行緣係  
遵舊制復正議以拯救軍官以消弭天變及奉欽依兵  
部看了來說事理未敢擅便等因嘉靖十年八月二十  
四日本部尚書王憲等具題奉聖旨是都准識行欽此

名臣經濟錄卷三十二



欽定四庫全書

名臣經濟錄卷三十三

明 黃訓 編

兵部 武選下

查草武職疏

該兵部題武選等清吏司案呈節該伏覩正德十六年四月二十二日詔書內一款自正德元年以來諸色人等傳陞乞陞大小官職盡行裁革吏禮兵工四部各將

查革過傳陞乞陞文武僧道匠藝官員名數類奏查考其皇親及公主所生子孫原無出身正途朝廷推恩陞授者不在此例又一欵兩京五府見任掌印簽書管軍管事公侯伯都督及都指揮六部等衙門見任文職四品以上并各處巡撫官俱聽自陳去留取自上裁武職內有傳旨管事者革去管事照舊帶俸又一欵正德元年以後在京在外官旗舍餘人等但係例外奏帶及稱報効在各邊各處或一人數處或一時兩三處報功或

併功陞授官旗者除原祖職役照舊其餘盡行除革該  
衛所各將革過名數造冊送戶兵二部查考敢有受財  
隱避不革及抗違妄奏者俱問發邊衛充軍諸色人等  
冒認錦衣衛官員戶下舍丁致陞官旗者限三箇月以  
裡許各官旗自首與免本罪冒籍之人革去職役過限  
不首該部查出或被人告發通行治罪發遣又一欵近  
年軍職人等在各邊不曾斬有首級巧立當先衝鋒等  
項名色及各處斬首不及數該部照例擬賞奉旨陞級

世襲者兵部通行查革又一欵賜姓人員及見犯罪冒姓者各復本姓在京者各照原有本等職役閒住隨住富差在外取到留用者不分官職大小各回原衛原籍帶俸閒住但因賜姓義子廕陞職爵并與做勇士等項食糧名色者兵部盡行查革又一欵正德元年以後各衙門官軍旗校人等緝捕妖言奸細并不係臨陣對敵強賊一應陞授職役者通行查革以後各該衙門照舊年終類奏兵部查議陞賞欽此欽遵俱經呈堂在京行

五軍都督府并所屬衛分及錦衣并親軍等衛所在外  
行都察院轉行各該巡按御史所屬及咨南京兵部各  
行查革去後延令將及一月在京府屬并錦衣等衛所  
未見將各官旗應存應革緣由回報相應議處案呈到  
部臣等仰惟皇上御極之初首頒前項裁革之詔蓋痛  
官爵之冗濫而欲為愛惜之圖念俸糧之糜費而思為  
節省之計更化善治宜莫先於此者各該衙門正當仰  
承德意疾速奉行庶前日之弊政不留而祖宗之舊規

可復今五軍都督府并所屬在京衛分及錦衣等衛所  
官員不以明詔為重本部查革文移到彼將及一月未  
見各將應存應革緣由造冊繳部蓋因各該府衛官員  
或人情稔熟欲抗顏而未能或依憑有人遂掣肘而難  
動若不另為處置誠為廢格詔書查得見該科道官會  
同戶兵二部委官清查錦衣衛旗校事頗就緒合無比  
照前例乞差風力給事中御史各一員本部委官一員  
屬錦衣衛者本衛選委老成能幹官二員遵照詔書內

事理將五府并所屬京衛及錦衣并親軍衛所應革人員每人審取親供二本各將原祖職役并例外奏帶或報効或拿賊等項獲功或因盜賊妖言獲功或非時冒叨恩級或併功陞職及傳乞陞職緣由備開明白差去官員逐一清查磨對各人應存應革職級扣算定擬停當備造文冊奏繳中間如有事涉疑似者臨時奏請定奪敢有隱避及抗違推調等項情弊聽各官叅究治罪庶冒濫名器之徒不致於漏網而清朝釐革之政不委

之虛文緣係差官遵詔查革冗濫官員事理未敢擅便  
正德十六年五月二十日本部左侍郎楊廷儀等具本  
奉聖旨是五府所屬京衛并在京親軍衛分便差風力  
給事中御史兵部屬官各一員遵詔旨清查屬錦衣衛  
者本衛選老成官二員會同清查欽此欽遵又該兵科  
等科都給事中汪玄錫等題亦為前事題稱武職乘時  
冒濫已非一日科道等官既承重任必須自立無過之  
地方免浮議且文冊浩繁展轉搬運恐生弊端合令各



官於相應公廨處所會同清查不許一應閒雜之人出入查得詔書內原令各該府衛衙門徑自查革造冊繳部已經通行日久訪得承委官員造有清冊前項冒陞之徒尚萌僥免之心百計破調以致承委官互相觀望不將清冊繳送乞勅各該衙門作急造完前項文冊繳送兵部該司收貯轉送科道等官清查如再遲延有悞行事各該衙門掌印官及承委官容令科道等官叅究伏望皇上特勅科道等官務要秉公持正悉心查革無

使清明之朝仍有名器冒濫之弊實為至幸等因題奉  
聖旨是各該清查官員務要秉公持正悉心查革毋致  
仍前冒濫該衙門知道欽此欽遵備行臣等會案行准  
兵部武選清吏司手本開送五軍都督府并所屬京衛  
及清軍旗手等衛所造完該查官旗文冊并各人親供  
及本部節年陞官奏帶堂稿前來又准職方清吏司手  
本准臣等手本行查各處鎮守分守守備等官奏帶分  
別例內例外則例開送施行等因到司准此查得先該

巡撫宣府左僉都御史秦紘奏稱各鎮守分守各內外  
官員不照巡撫官員事例俱各奏討在京官舍名為親  
信頭目在邊跟用寅緣為奸非止一端要將各處奏討  
頭目盡數取回以後不許奏討等因該本部議得合無  
今後鎮守分守等項內外官員奏討跟用之人原係五  
名者減作三名原係十名者減作六名務要嚴加簡選  
不許寅緣投托本部仍通行各邊內外官員一體申明  
禁約帶去之人既不寅緣投托圖財蠹政亦不許泛濫

差遣假公行私倘有事發連坐本主如此庶幾不敢容  
無藉之徒邊方亦不缺可用之人但奉有上項節次欽  
依事例未敢擅便定擬伏乞聖裁成化二十年十二月  
二十日具題奉聖旨是各處跟隨人員既多奸弊內外  
鎮守官與五名分守等官與三名多餘的都查取回京  
今後都照這例行欽此又查得公務事該太監姚舉題  
蒙差鎮守江西地方奏帶去支廩給官舍指揮使楊輔  
等五員名并不支口糧軍舍姚文等六名該本部查得各

處鎮守分守等項內外官員奏帶跟用頭目內鎮守官  
許帶五名分守等官三名應付口糧脚力若係團營操  
備并侍御上直人員不許奏帶又查得內外守臣係鎮  
守者許帶指揮以下係分守者許帶千戶以下係守備  
者許帶百戶以下止以原擬名數不許過多如有故違  
聽本部叅奏究治俱係見行事例叅照太監姚舉係鎮  
守官員例該奏帶頭目五名今却數外多奏姚文等六  
名但查楊撫劉成董英各見在團營操備李椿等又係

辦膳人員於例俱難准擬所擬支口糧冠帶舍人姚鎮等并不支口糧軍舍姚文等既查無碍人數合無行令本官仍就於多奏不支口糧軍舍內另選三名替補指揮楊輔等贖足五名之數前去應用楊輔等各送該營把總操練李椿等仍尚膳監辦膳等因正德元年六月初三日題奉聖旨是欽此又為公務事該大同總兵官溫恭奏稱原任大同左副總兵奏帶官舍祁宣等三員名支廩給口糧劉元吉等九員名不支口糧見在聽用

今克總兵官例該五名支口糧除祁宣等三名尚缺二  
名訪得錦衣衛等衙門通事舍人官旗李秉等二員名  
支給口糧劉奉等一十三員名不支口糧乞發聽用等  
因具題正德三年五月奉聖旨照例這鴻臚寺通事并  
譯字通事係應役人數不許奏帶別項雜差如有鎮守  
先行奏帶去的着禮部并大通事查照取回着役該衙  
門知道欽此又為公務事該延綏叅將田琦例外奏討  
頭目該本部議得本官奏討侯俊等係例外之數擅難

定議等因具題正德十四年三月奉聖旨田琦既以奏帶跟隨三名這例外奏討的不准今後有似這等例外黃緣奏討的儘部裡參究來說欽此欽遵合用手本前去查照等因又准該司手本開稱太監陸閤尹生等雖有奏帶原無花名無憑開報等因臣等會同將五府所屬京衛并在京親軍衛所應革官旗逐一清查內錦衣衛仍會同委官千戶陳澍等清查通行磨對扣算明白內有開報不明取供未到緣事故等項俱候兵部另行



臣等仰惟皇上天啟聖明臨御之初誕下明詔絲綸煥  
赫條貫精詳舉行舊章剋剔宿弊凡在臣民豈勝歡抃  
所擬正德元年以來軍功冒濫官爵繁冗甚非祖宗之  
法臣等仰遵明詔通行查革備造文冊奏繳外但簿書  
浩繁不宜猥瀆聖覽所有弊端之未能盡除事體之尚  
須釐正者敢昧死重為陛下言之仰惟我祖宗開國以  
來立為武爵專以待有功之臣延及子孫俾世其職報功  
之典可謂重矣然品秩之尊莫有過於公侯伯者自非

定難拓土之功不以輕授故我太祖高皇帝開天啟運  
不階尺土奄有區夏而一時翊運元臣佐命宿將驅除  
剪滅懋建厥功然在當時封公者六人封侯者二十有  
八人至我太宗文皇帝始自藩封克登大寶其所封拜  
亦不滿十餘人列聖相承益加慎重中間屢嘗殲夷大  
憝蕩平羣盜戡伐戎寇立功之臣後先相望蓋不為少  
然未有中官弟姪封拜之濫爵賞之極如先朝者也臣  
等參照寧夏之役雖曰寘鐫背逆天道實由逆瑾結憤

人心彼時賴都指揮仇鉞之兵一舉平定而太監張永  
聞風趨赴攘為己功幸而禍亂克平實仗宗社之慶後  
逆瑾伏誅永與有力僅可以贖黨惡之罪豈應遽為討  
賊之功既而太監谷大用馬永成陸閏魏彬等結為朋  
黨專權出政乃以運籌帷幄並受褒崇於是以永兄張  
富封泰安伯弟張容封安定伯谷大寬封高平伯谷大亮  
封永清伯馬山封平涼伯陸永封鎮平伯魏英封鎮安  
伯其他俱以功廕加陞都督指揮者又不下數十人貂

蟬玉帶勢輾班行鐵券金書光動閭里身不出國門之外足未履戰陣之地曾無旦夕尺寸之勞而一槩大拜封爵坐獲殊寵此士夫之所以痛心而將臣之所以解體也今仰遵詔旨俱以查革候命下之日合行該部追奪誥券削為編氓但張容魏英已經辭免伯爵復被新命仍與做都督同知張富與做錦衣衛指揮使且三人者均冒無功之賞尚逭有罪之誅况大小冒濫人員既以盡行削革而容等有官如故不免陟罰異同伏乞特

賜威斷將容等見存職級盡行褫奪革其世襲庶足  
以光昭祖宗之法而一洗名器之汙也再照正德年間軍  
功之濫其弊有三奏帶之數太多紀驗之次失實武選  
之法盡壞如鎮守官奏帶例該五名分守官奏帶例該  
三名今則七八十名者有之五六十名者有之其領兵  
奏帶至三四百名者有之如錦衣衛官校旗舍俱係侍  
衛直駕人員與夫京營操備官旗例無奏帶之例今則  
公然違例奏帶而前項人員獨多蓋以各處鎮守太監

類皆出自權門援引是以彼此互相結納遇有地方用兵則以所帶之人盡隸報功之籍往往安居京師寄名邊方故有一人而數處奏帶一時而數處獲功其不在斬馘之例又復巧立別名或曰運送神鎗或曰賁執旗牌或曰衝鋒破敵或曰三次當先如寧夏之訪尋金冊河南之軍前効勞皆是也紀驗之地既無審覈之公銓選之司又無駁勘之實當給賞者每破例而冒同陞官應查議者輒陞除而許令自首其改正重陞併功加授

之類私謀巧術弊出百端難以枚舉臣等查得寧夏陝西甘涼雲南貴州江西湖廣等處平賊功次中間俱有冒濫未能盡合條格獨貴州香壩山之役錦衣衛報功陞授者尤為冒濫山東河南征勦流賊其功雖有可稱而太監谷大用張忠陸閏尹生等各人奏帶巧立名色陞授職級者幾六百員名其冒濫抑又甚矣今仰遵明旨將例外奏帶之人通行查革其各處歷年紀功官員審覈不公雷同為詐有負朝廷耳目重寄者乞勅兵部

查議明白移咨吏部通行罷黜以警將來再照各處討賊既平內外中官大臣類授武職功廕尤非祖宗之法竊謂各該領兵官員奉命出師致有成功乃其職分廟堂籌畫理亦宜然且克捷之日既身加官爵之崇又家受金帛之賚莫非優典已足酬功奈何重以武爵廕及子孫寵報逾涯實難負荷但近年文職功廕多因中官妄希恩數一例普及心知非義辭拒弗能今仰遵明詔一體查革臣等伏乞自今以後內外文臣果能身兼將



相功業顯著者朝廷欲加殊恩豈無別項典與不必假以武廕以干清議實足以厲士夫廉靖之節足以服邊庭將士之心再照正德元年以來各衙門緝獲妖言強盜并不係臨陣對敵一應陞授職役者已經遵照詔旨盡行查革臣訪得天順成化弘治初年指揮門達袁斌朱驥等提督緝捕每至十年或十一年方纔一次類奏其間委係積有年勞獲有奇功者該部查勘是實分別等第奏擬陞賞然陞者不過五七人多至十人而止

其賞者或以布絹或以鈔錠其無功者尚或責打黜退當差自後因其拿獲妖言陞襲一輩之例於是人競貪功大肆羅織所獲妖言強盜多是冤枉故弘治十八年之詔痛欲禁革此弊當時已有濫觴之漸及正德元年錦衣衛指揮趙鑑葉廣東廠太監王岳鄭旺各官一時更代數月之內將辦事官校四次奏陞正德二年又復類奏當時已經該部叅論馴至近年以來奸倖用事廠衛專權無賴之徒鱗集蟻附創設四廠復立內刑辦事

之員日增獲功之奏漸數始則三年一奏或二年一奏  
後至一年一奏或一年兩奏遂有年終類奏之名往往  
以妖言為首張皇賊狀無非掎摭之詞連署姓名不辯  
獲功之數含糊奏請朦朧擬陞奏一人則陞一人奏百  
人則陞百人以致市井庸流不崇朝而立陞朝籍權門  
厮役不數歲而驟至顯榮且其假種妖書陰為陷甯買  
同番手誣執平民加以酷法慘刑煅煉成獄凡經嚴衛  
奏送法司莫敢平反冤魂塞路上干天和凡有人心言

之憤結且弘治元年奉有孝宗皇帝聖旨以後拿獲妖言的不陞止照成化十四年例給賞綸音具在所當萬世遵行不知該部何所稽憑類將妖言陞級方今聖明在上妖孽自不能興况亦律有明條不須另開賞格但輦轂之下畿甸之廣盜賊竊發難保必無以後合無每年年終類奏止將獲過強盜起數題送兵部附卷定為三年或五年之制待年滿方將各人各年之內獲過強賊多少分為等第查奏陞賞然每陞不過十人給賞不

限名數已陞者仍依舊例不得再陞其類奏獲過盜賊起數不許仍前混開務見某人拿獲某賊或某人為首某人為從明白開其月日地方其有賊勢衆兇登時拏獲功出尋常者兵部即時奏請定奪類奏之時仍須開報如此則人思建實功官無濫授獄無冤民而盜賊亦不至猖獗矣再照五府錦衣衛之立一則管轄兵馬一則專掌宿衛掌務之職或以流官或由推舉蓋用其能而不用其世所以待武臣之大有勲勞超出羣類者也

然亦惟武臣之冑而他途不得與焉其選可謂重且嚴矣近年以來乃有不由武冑雜然並進大抵非嬖幸冑功之徒即技藝希恩之屬援朋引類車載斗量入則金紫雜沓於班行出則僕從喧闐於道路遂使國家以賞功之典為施恩之具不惟加諸其身而又使之世襲使邊庭效命之士扼腕不平祖宗法度之所以漸更朝廷紀綱之所以大壞府庫之所以耗斂倉廩之所以空虛生民之所以困苦盜賊之所以繁興災異之所以疊見

未必不盡由於此也臣等仰遵明詔將正德年間一應  
冒濫之流通已查革外乞勅兵部查照先年凡不由軍  
功授職者日後仍照詔旨革其子孫承襲伏望皇上繼  
今已往念祖宗得天下之不易惜朝廷官爵之匪輕非  
軍功決不可授以武職非異才決不可試以流官使天  
下之人知得之為難則國家有事可以勸忠厲能而足以  
措宗社於泰山之安矣再照兵部近年以來選法不明  
人自為例如流官不許世襲署職止加實授係是祖宗

累朝成法不知起自何人乃敢擅為變亂即今查革過  
冒濫人員數多中間蓋有流官以流得襲署職以署加  
陞甚至納粟虛銜遂以軍功累授近日推舉各處將官  
多有見在裁革之數事多違法責在該司較諸犯功之  
官其罪尤為不同乞勅該部通行查出從重叅究庶將來  
官爵不至於冒濫而祖宗典章不視為虛文也再照五  
府所屬京衛并在京親軍衛分自明詔開讀之後兵部  
行文查革各該衙門既以遷延一月不報及該兵部題



奉欽依差科道等官會同清查臣等聞命之日即復會  
案備行嚴立期限不次催督乃復仍前延緩前項文冊  
幾於兩月方纔造到顯是各該掌印首領及承委官員  
奉行不力事屬稽遲俱當有罪乞勅該部通行叅究以  
警諸司再照裁革過職級如都指揮等官見在各該地  
方領勅管事者皆是夤緣而出原非選舉之公合無乞  
勅該部逐一查取回京另推相應官員銓補庶存甄別  
以厲賢能及照前項汰黜人員通計三千有奇中間大

率城狐社鼠稔於鑽刺之人竊恐心存覬覦不顧搖尾之羞力可夤緣未絕回天之想萬一敢有抗違奏辯之舉即係懷奸亂法之人伏乞陛下赫發震怒亟加嚴譴庶有以杜塞倖門挫懾羣小尚願陛下普垂離照益厲乾綱振起綱維申飭憲典慎重名器以待天下之勲勞節省財用以安海內之百姓上為宗廟社稷建不傾不拔之基下為子孫黎元開可久可大之業臣等不勝幸甚天下幸甚緣係開讀事理未敢擅便今將查革過官

旗數目開坐謹題請旨

明卹典以定功賞疏

昨該兵部題為乞恩比例加陞親兄陣亡功級以圖補報事武選清吏司案呈奉本部送兵科抄出陝西行都司甘州左衛指揮使孫淮奏兄孫鏜原係指揮使職事嘉靖二年十二月內領軍調征東路寇賊追至地名打磨溝與賊對敵奮勇身先射中一賊落馬督軍就陣擒獲餘賊發恨齊擁撲奪將兄射斫陣亡因兄乏嗣臣係

同母親弟例該承襲嘉靖五年二月內保送襲兄原職  
回衛到任管事今蒙劉御史將兄陣亡功次勘明造冊  
繳部思得綏德衛一般陣亡指揮僉事周仁伊男周邦  
先襲祖職後加伊父陣亡陞級蒙授指揮同知臣與事  
體相同伏望皇上憫念臣兄死鋒鏑之苦一視同仁乞  
勅兵部查照臣兄陣亡陞級明白照例將臣改正加陞  
都指揮僉事等因奉聖旨兵部知道欽此欽遵抄出送  
司查得嘉靖五年二月內該陝西行都司甘州左衛陣

亡指揮使孫鏜親弟孫淮前來襲職該本部查明欽選  
祖職指揮使訖續該巡按陝西監察御史劉濂奏繳嘉  
靖二年十二月內甘州地方功次文冊前來內有甘州  
左衛陣亡指揮使孫鏜該本部照例擬陞一級與做都指  
揮僉事保送應襲兒男赴部襲陞等因嘉靖七年正月  
二十九日題奉欽依備行去後今該前因案呈到部看  
得陝西行都司甘州左衛指揮使孫淮奏稱伊兄孫鏜  
原係指揮使嘉靖二年甘州地方殺賊陣亡伊襲祖職

指揮使今乞要照例加陞伊兄陣亡功級一節查照本  
人襲職及伊兄陣亡陞級緣由相同合無備行該衛再  
查無碍准令孫淮於原襲指揮使上加伊兄陣亡一級  
與做都指揮僉事於原衛所查照施行仍將本官原舊  
職俸開除等因奉聖旨是欽此臣等看得前事該部議  
擬似未穩當請為陛下言之查洪武十九年令從征官  
沒於陣所者子孫襲職陞一級又查得天順正德年間  
陝西地方敵殺寇賊賞例凡陣亡者俱陞一級皆為子

孫襲職而言今孫淮却是以弟襲兄又伊祖職原係指揮使重職假使孫鏜有子則孫淮止是軍官舍人今以兄鏜之嗣遂獲承襲三品職事匹夫一得此已溢分望乃復援引周邦以子襲父之例欲將伊兄陣亡一級併加本身所據父子兄弟事體不同該司縣以陣亡常例查覆即將孫淮擬陞都指揮僉事以上必以材能軍功方得推陞選用名為流官不許子孫世襲今孫淮本非自立軍功又無材能可見若復以兄陣亡遽陞都指揮僉

事似以流官亦得襲陞殊非舊制況自來無因兄陣亡陞弟明例查得正德十六年題准襲職事例內開今後軍職或千戶或指揮獲功陞至都指揮以上內都指揮僉事以上職級雖未任先故者子孫止許承襲指揮使夫實有軍功陞職未任而死者子孫猶不得襲陞流官況孫鏜係陣亡非功孫淮係弟非子乃得以指揮使而冒陞流官為都指揮僉事可乎臣等竊謂陣亡陞級本以憫念死者惟鋒鏑之慘故令子孫承襲加陞一級若



其不幸無嗣則前項優恤之典正宜加諸死者之身合  
無今後武職陣亡無子孫者應該承襲之人止許授以  
祖職仍將陣亡該陞一級追贈陣亡之人自指揮使以  
下都指揮僉事以上皆用此例其旗軍陣亡無子者則  
查照正德年間陣亡不願陞者賞銀十兩之例止賞銀  
十兩以優恤其家其陣亡有子孫者自指揮同知以下  
皆得照例襲陞惟指揮使陣亡則亦止當追贈為都指  
揮僉事蓋其祖職官階已尊而國典流官不得襲也其

諸武職百戶以上自立軍功於祖職上累陞至指揮使而無嗣者應該承襲之人亦當革去續立軍功職級止許襲授原祖職事仍於本身原職上亦得加贈一級若累功陞至都指揮以上者加祭一壇如此則死者之心得以少慰而生者之福不致過徼似於國典人心兩無偏碍如蒙伏望皇上俯注聖覽少紓睿思倘以臣等所言非謬特降綸音勅下該部列為著例永久遵行仍乞將孫鏜准贈都指揮僉事其孫淮所陞都指揮僉事一

級先乞明旨革去止照原襲指揮使供職則卹典所加各有攸當而功賞為重庶幾不濫施矣緣係明卹典以定功賞事理未敢擅便謹題請旨

賞功之格一丘濬

臣按後世計首級以定軍功始於此嗚呼生天地間而靈於物者人也人與人同類相生以相愛相死以相衛人之理也天之道也世降而偽滋人與人乃相戕相害均是人也而又殺人以為功是豈人道當然哉夫自五

帝三王之時已有爭戰之事然其人化服即止不至殺戮之甚如後世也至秦用商鞅始尚首級後世襲用之以為當然而不可易百世如一日也後世忍心貪功之人乃至誣平民截死屍以為功次皆秦作俑之遺禍也臣嘗謂天下之事惟武功一事最難得其盡善而無遺弊何也蓋興師動衆人至多也臨陳對敵機無窮也不殺則不足以退敵而功不成是武功之成必在於殺人也是故論功者恒以殺敵之多少以為功庸之差等古

昔盛時固已獻馘於學宮載之詩禮者可考也非但秦也蓋至秦乃益甚焉耳今若不用秦之法而於武功告成之日一例陞賞然而勇者怯者同賞孰肯効死而爭先若依舊以首級為功方其戰酣乘勢之際其勢有進而無退既斬敵首何暇轉而持之非獨為人所有而敵亦或得以制其命矣二者皆非萬全無弊之法然則果何如而可臣竊以為自古國家所以賞功者爵與財而已矣爵以名而致貴財以利而致富是名與利富與貴乃

人之所甚欲而甚慕者也。以人之所甚欲者，以為賞功之具；蓋以性命者，人之所甚惜；身體者，人之所甚愛。人能舍其所甚愛，甚惜之性命、身體，以為我操兵戈以禦敵，以衛生靈，以安社稷，厥功莫大焉。於是乎即其所甚欲，甚慕之貨財、官爵，以報之焉。報其已往之功，所以作其將來之志，非但為其人，蓋為乎國也。然其所立之功，有大有小，有多有寡，有緩有急，有易有難，不可以一例觀也。不可以一例觀，亦不可以一例報。而戰陳之時，急

迫之際紛亂之中安能一一得其輕重多寡之實而權度之不差哉將使人臨陳而監之歟則目力所及有限而不能周將使人隨衆而紀之歟則人心所存不同而不能以皆公不然則將待其功成而通第之歟則是非真贗何所據而分辨臣竊以為古人有言惟公生明公則已不為私明則人不能欺在己者既不為私自然有以畏服人之心志而人不敢欺已矣國家當有事命將之時必於廷臣中擇平日理明而心公智周而性執者

以為紀功之官使其隨時制宜權其緩急難易以定其功次使上下通知彼此保證一有疑似難明紛爭不已者即與移文考覈結正必須詳實歸一然後明白開具榜於通衢如科試揭曉然考有不公者許其指名開告其作私及蒙蔽之人有贓者計贓論無贓者削去功次如此雖未盡善亦庶幾乎大凡天下萬事莫外於一實惟實則人心無不悅服更乞朝廷下文武大臣將出軍賞功資次立為定式俾其遵守原在軍伍長行及出



榜召募者則一例造冊其有內外臣僚子弟臨時方行  
自投報效者則具名開奏取旨蓋此等之徒皆非真有  
智勇欲為國家出力蓋藉父兄勢力乘機欲得進用耳  
所以懈怠人心激怒士卒者皆此等者為之不可不知  
也又有將帥遇有征差輒將子弟親識奏請從行及左  
右使令吏胥之輩其實不曾臨陣往往敘作軍功不次  
陞賞夫以出師取勝非一人智力所能獨成其臨陣奮  
勇者固為有功然左右將領為人叅謀運智以助其所

不及協力幹濟以輔其所不能彼此皆不可相無者烏可全謂其無功哉但不可以斬馘論耳為今之計宜多立名件如斬將搴旗奮勇當先之類各於本類下次其名姓并著其所效之實績若是隨從之人明書曰某人隨從某官參謀運智或協力幹濟有功合準作首級幾功不許混報斬首功次如此則事得其實而士卒効力者不起爭憤之心矣又有陣亡士卒以其既死無人開報遂至泯滅今後但有臨陣戰亡者必須同伍開報不

報者有罪死者一功當生者二功其有不曾臨陳而亡者雖無禦敵之功亦為王事而死亦須同伍開報量加優賚其子孫

賞功之格二

丘濬

臣按陸贄此疏可見有唐一代賞功之格所謂爵號者如今公侯伯之類所謂職事者如今都督都指揮千百戶鎮撫之類所謂勲者如今柱國騎都尉之類所謂散官者如今光祿大夫驃騎將軍之類在唐則分為四類

而今日則惟三類焉蓋在今之勲階散官隨職事而有非若唐別以授人也我朝異姓無生而王封者列爵惟公侯伯而無子男歲錫以祿而無唐宋食邑之虛名蓋自漢以後以官爵封功臣所僅見也其職事之官皆以階級相承無不掌務而授俸者但就其中又分為等第焉有世官有流官世官則以軍功得官而子孫得承襲者也世世不絕自指揮使以下至於鎮撫是流官者因其材能擢以任事則終其本身而不得世襲在內則五

軍都督錦衣衛指揮在外則都指揮及流官是也贊謂輕重互相制而國不失權我朝祖宗蓋得此意矣其報臣之功則賞延於世因人之能則盡用其材得唐人之實而無其虛焉嗚呼三代以來所未有也伏願聖子神孫念祖宗得天下之不易惜祖宗之官爵保祖宗之功臣追崇其所已然以報其功振作其未然以激其志非軍功不授以武職非異材不試以流官使天下以得之為難則我國家一旦有事人人欲得我之官爵以為子孫

計則得之者盡職以保其家未得者竭力以求吾祿如此則維持之者既固奮起者又繼之則凡吾心之所向無不如意事之所舉無不成功宗社之安如泰山而四維立矣伏惟聖神留意毋輕以賞功之典以為施恩之具而輕以授之嬖倖技藝之流則天下國家不勝大幸

賞功之格三

丘濬

臣按朝廷立武爵以待有功之臣必親臨行陣者然後為軍功彼其出禁旅左右承奉者雖有年勞當別甄叙

我朝立錦衣衛以掌宿衛官職之設雖與列衛同而其官則用其能而不用其世蓋所以待武臣之超出羣類者也然亦惟武臣之胄而他途不得與焉其選可謂重而嚴矣今世乃有不出自武胄而以嬖倖技藝進者失祖宗之初意矣夫技藝之流舊制當屬工部今因其能而用以雜流俾專司其業豈不名稱其實哉顧乃以賞功之官以為恩賜之具彼得之而人譏之固不足以為榮彼何足惜遂使國家失賞功之常典而凡親臨行陣

出萬死得一生者皆因之以解體其失豈小小也哉授之以是官固非矣而又使之世襲可乎彼技藝之流有異能者朝廷以特恩授之可也而其子豈亦有異能而使之世其官乎有異能且不可況實無異能在其身且不可況又延及其子孫乎

賞功之格四

丘濬

臣按祖宗立為武職專以賞有功之臣以延及其子孫世其職而不遷不計滿限不用磨勘父死而子繼兄亡



而弟及官職簡而階級明非若宋人遙授遷轉無定職  
且無定員也今制十軍立一小旗五十軍一總旗兩總  
旗一百戶十百戶一千戶千戶有正有副千戶以上有  
指揮指揮有使有同知有僉事此皆世襲之官也至於  
都指揮都督各三等亦如指揮之制此則擢其有才能  
者為之用其才而不世其官者也祖宗之制可謂盡善  
盡美後世雖有作者不可及也奈何積日久而人日多  
前之積者未銷後之來者日至遂至軍少而官多所任

者一夫之事而所食者大官之祿欲國計不屈難矣伏  
惟我太祖高皇帝於洪武二十九年大賚天下致仕武  
臣諭之曰同立艱難致有今日顧朕子孫保無窮之天  
下則爾子孫亦享無窮之爵祿一何仁之至也太宗文  
皇帝於永樂二年因法司言征討官有繫獄者論功定  
罪諭曰朝廷大公至正之道有功則賞有過則刑刑賞  
者治天下之大法不以功掩過不以私廢公一何義之  
盡也仁之至所以報其功使其世世享爵祿之奉以衍

其家慶義之盡所以厲其節使其世世奉法度之公以保其世祿大哉皇言萬世所當服膺者也然祖宗不惟形之言者仁義盡至如此而又著之於法律以維持警飭之使吾仁義之澤百世如一日焉伏讀律文有曰凡內外大小軍民衙門官吏犯公罪杖罪以上明立文案每年一考紀錄罪名九年一次通考所犯次數重輕以憑黜陟又曰若軍官有犯私罪該答者附過收贖杖罪解見任降等敘用該罷職不叙者降充總旗該徒流者

照依地里遠近發各衛克軍嗚呼太祖定律之意即太宗垂戒之言也誠能本太祖立律之文用太宗垂戒之意則武臣益知所懼無有不盡忠守法者矣然人之性質不能皆同其間固不能無不思不謹者焉因其人之所犯而用國法以遞降之消之以漸日減月削去者去而來者來今之來者即所以補乎昔之去者焉則人與官互相稱矣尚何軍少官多之患哉臣於此又有見焉孟子曰君子之澤五世而斬註謂父子相繼為一世四

世而總服之窮也六世則親屬竭矣夫以大賢君子功業見乎一世德澤被乎天下其沒世之後四世而後子孫尚廢其祀況彼一介武夫乘時崛起因人而成事隨衆以建功未必真有出奇制勝之智寡旗斬將之勇立難拓土之功錫之以官爵食之以俸祿終其身也已為多矣況及其子若孫乎況無子及孫者又及其旁枝別派乎且開國大臣封公者六封侯者十有五其餘封伯及繼封者又不上數十人今存者無幾大功多廢小功

獨存何大功之澤不究而小功之澤反延哉今文武官  
犯公私罪律條久廢驟而用之恐駭物聽臣請勅兵部  
查內外貼黃將洪武永樂宣德年間以來官職從軍陞  
授緣由及行內外衛所并各官原籍戶口若干舊任遺  
下家屬若干要見其人是始初從軍者的派子孫與否  
明白詳實備具聞彼此對照無差然後將前項軍官分  
為三等一曰奉天啓運二曰奉天征討其他立功邊廷  
及隨大將平寇者居其次三馬啓運征討之功已經五

世之後若不係從軍人的派者革去職任其子孫附籍  
所在世世優免雜差五世之後仍係從軍的派子孫者  
遇有公私過犯依律遞降不在赦原之數無犯者照舊  
其不係啓運征討及各處立功者三世之後子孫不係  
的派者革職的派子孫五世之後有犯者遞降又有加  
功者不革否則革之其五世三世之後例該革任者其  
間有一世以王事死及再加功者又從此人起計其世  
數以上皆優免其子孫如此則禮與律皆協人知所勸

效而官不至於冗濫矣臣愚見如此非敢犯衆怒而輒興異議以取張仲瑀之禍念此乃國家大事不於無事之時而預有以爲之調停一二馴致於無可奈何之地雖有智者不能爲矣伏望明主閔其愚而察其心毋使若高歡者得以起邪心也

武選清吏司題名記

呂枬

夫武選者知選注武人對文選設也題名記者題諸郎中員外主事名於石而記之也舊記事詳而畧茲陳德



英諸大夫悉索洪武來選簿而申諸石請耕記之也是  
故以終官係歷任以歷任係發科以發科係籍以籍係  
字以係名氏而屬之司三官於以考勲而詢奸訊仁而  
摘暴稽廉而尤貪明明而恥幽進壯而退劣崇實而卑  
謫貴嚴而賤疎兵有七程題名近之夫自文武道分文  
以知化武以知衛皆於民焉食之其選不可不慎也今  
天下都司二十一留守司衛四百九十一守禦屯田羣  
牧所三百十一番夷都司衛所四百七而儀衛宣慰招

討宣撫安撫長官司不計則其為兵不啻萬億為官不  
啻百千食乎民力者不啻盡矣咸於斯司馬宰分名可  
勿題乎故今制統軍以三爵五府謂公侯伯中左右前  
後聯軍以九職謂總兵叅將遊擊守備協守備倭提督  
等官以十有二勲柱國至武騎尉秩官以二十有四階  
榮祿大夫至忠武校尉咸於斯司馬叅達名可苟題乎  
故內以衛宮門外以障邊郵中以宅生靈故雖上有部  
尚書左右侍郎卿三人然皆提綱而挈領不及斯司之

精專下有車駕職方武庫三大夫然皆析務而承緒不  
及斯司之體要名可易題乎故今法以六黃正親供正  
續內貼外貼大小以五實釐誥勅歸附征克陞轉衛所  
流襲以五除徵選簿陞調復傳特以六地叙功次北敵  
女直西番苗蠻內地反賊以九誅慎軍機殺降失機陷  
城逃敵激叛等以四義御流官都指揮僉事以上及義  
男女婿襲替及革授者以七咎斷世襲典刑敗倫不孝  
失機劫盜退陣人文不至以八戎懲專縱擅調發不策

應縱擄掠等以七罷戒不恪緩報稽需違期歇役私賣  
器馬等以加陞課部卒以遞降練什伍以附過御還職  
以三試定武舉以考選比試併鎗達才而程力故斯司  
郎中二文選員外郎一文選主事五文選而其遷之也  
內或列卿佐外或雄藩而巨鎮亦與文選畧等名豈徒  
題乎夫功莫大於安社稷嚴莫大於存綱紀智莫大於  
止傳陞勇莫過於黜貪猾信莫大於守律令愛莫大於  
登才賢廉莫大於清交游此非其實乎夫實盛則名雖

勿題而常存實之不足雖好名者莫能保旬月美也國  
家百五十年來郎中由范子敏員外由李本主事由孟  
禮不啻千人如得其實者必其人名位勲德顯如日月  
至今人猶誦慕之則其字亦尊籍亦光科亦榮厯官亦  
重也使無其實固有如今日待查選簿而後知名者矣  
如其待查選簿而後知又奚能知其字與籍與科厯官  
哉於時德英及路君敬夫及吾年友李君宣文及蔣君  
汝潔汪君汝梁王君子中王君子崇皆曰斯往也敢使

他日待查選簿而後知名以辱吾子言而愧斯石乎  
曰石選簿又何難焉於是諸大夫咸曰茲知所以先石  
選簿矣

名臣經濟錄卷三十三